

FEDERACIJA BOSNE I HERCEGOVINE  
FEDERALNO MINISTARSTVO OKOLIŠA I TURIZMA

NACRT

**UREDBU**  
**O KRITERIJIMA ZA OBRAČUN I NAČIN PLAĆANJA NAKNADA ZA**  
**PROIZVODE KOJI NAKON UPOTREBE POSTAJU AMBALAŽNI**  
**OTPAD I ELEKTRIČNI I ELEKTRONSKI OTPAD**

Sarajevo, jun 2018.godine

Na osnovu člana 19. stav 1. Zakona o Vladi Federacije Bosne i Hercegovine ("Službene novine FBiH", br. 1/94, 8/95, 58/02, 19/03, 2/06 i 8/06), člana 18a. stav 4. i člana 58. stav 3. Zakona o upravljanju otpadom („Službene novine FBiH“, br. 33/03, 72/09 i 92/17), a na prijedlog Federalnog ministarstva okoliša i turizma, Vlada Federacije Bosne i Hercegovine, na \_\_. sjednici, održanoj \_\_\_\_\_ godine donosi

## U R E D B U

# O KRITERIJIMA ZA OBRAČUN I NAČIN PLAĆANJA NAKNADA ZA PROIZVODE KOJI NAKON UPOTREBE POSTAJU AMBALAŽNI OTPAD I ELEKTRIČNI I ELEKTRONSKI OTPAD

## POGLAVLJE I. UVODNE ODREDBE

### Član 1. (Predmet Uredbe)

(1) Ovom uredbom utvrđuju se kriteriji za obračun i način plaćanja naknada za proizvode koji nakon upotrebe postaju ambalažni otpad i električni i elektronski otpad, obrazac evidencije o količini i vrsti proizvedenih i uvezenih proizvoda i godišnjeg izvještaja, način i rokovi dostavljanja godišnjeg izvještaja, obveznici plaćanja naknade, kriteriji za obračun, visinu, način obračunavanja i plaćanja naknade.

### Član 2. (Značenje izraza)

Izrazi upotrijebljeni u ovoj uredbi imaju slijedeće značenje:

- 1) *ambalažni proizvodi* su oni proizvodi, neovisno o prirodi materijala od kojih su napravljeni, koji su namijenjeni za sadržavanje, čuvanje, zaštitu, rukovanje, isporuku i predstavljanje robe, od sirovina do gotovih proizvoda, na putu od proizvođača do korisnika ili potrošača. Ambalažni proizvodi također uključuju pomoćna sredstva za pakovanje, koja služe za omotavanje ili povezivanje robe, posebno za pakovanje, nepropusno zatvaranje, pripremanje za otpremu i označavanje robe;
- 2) *električni i elektronski proizvodi* su proizvodi čiji rad zavisi od električne struje ili elektromagnetnih polja, kao i proizvodi namijenjeni za proizvodnju, prienos i mjerenje struje i elektromagnetnih polja, za korištenje kod napona koji ne prelazi 1000 V za naizmjeničnu struju i 1500 V za jednosmjernu struju;
- 3) *obveznici izvještavanja* su svi proizvođači, uvoznici i distributeri proizvoda koji nakon upotrebe postaju ambalažni otpad i električni i elektronski otpad, a koji vrše uvoz i proizvodnju na teritoriji Bosne i Hercegovine, bez obzira na sjedište (u daljem tekstu: obveznici izvještavanja);
- 4) *obveznici plaćanja naknade za upravljanje ambalažnim otpadom i električnim i elektronskim otpadom* su svi proizvođači, uvoznici i distributeri sa teritorija BiH, koji prvi put plasiraju na tržište Federacije BiH ili sami koriste kao krajnji potrošači u FBiH proizvode koji poslije upotrebe postaju ambalažni otpad i električni i elektronski otpad (u daljem tekstu: obveznici plaćanja naknade);
- 5) *naknada za upravljanje ambalažnim otpadom i električnim i elektronskim otpadom* je naknada koju proizvođači, uvoznici i distributeri proizvoda, koji poslije upotrebe postaju ambalažni otpad i električni i elektronski otpad, po načelu „zagađivač plaća“, plaćaju za

pokrivanje troškova unapređenja ukupnog sistema upravljanja ambalažnim otpadom i električnim i elektronskim otpadom (u daljem tekstu: naknada).

6) *evidentirajuća naknada* je naknada koju proizvođači, uvoznici, punioci/pakeri i distributeri proizvoda, koji poslije upotrebe postaju ambalažni otpad i električni i elektronski otpad, plaćaju za pokrivanje troškova administriranja sistema upravljanja ambalažnim otpadom i električnim i elektronskim otpadom u Fondu.

7) *prvi plasman proizvoda* je stavljanje proizvoda uvezenog ili proizvedenog u BiH prvi put na tržište Federacije Bosne i Hercegovine (u daljem tekstu: FBiH) uključujući i slučaj kada takve proizvode proizvođači ili uvoznici koriste kao krajnji potrošači.

8) *operater sistema* je pravno lice koje po principu "produžene odgovornosti proizvođača" ispunjava ciljeve za reciklažu i iskorištenje posebnih kategorija otpada i može biti osnovan isključivo od pravnih lica koja obavljaju svoju poslovnu djelatnost stavljanjem u promet proizvoda koji postaju posebne kategorije otpada.

## **POGLAVLJE II. PROIZVODI KOJI POSLIJE UPOTREBE POSTAJU AMBALAŽNI OTPAD I ELEKTRIČNI I ELEKTRONSKI OTPAD**

### **Član 3. (Posebne kategorije otpada)**

Proizvodi koji poslije upotrebe postaju ambalažni otpad i električni i elektronski otpad su:

1) ambalaža, neovisno o prirodi materijala od kojih je napravljena, namijenjena za sadržavanje, čuvanje, zaštitu, rukovanje, isporuku i predstavljanje robe, od sirovina do gotovih proizvoda, na putu od proizvođača do korisnika ili potrošača. Ambalaža također uključuju pomoćna sredstva za pakovanje, koja služe za omotavanje ili povezivanje robe, posebno za pakovanje, nepropusno zatvaranje, pripremanje za otpremu i označavanje robe.

5) električni i elektronski proizvodi čiji rad zavisi od električne struje ili elektromagnetnih polja, kao i proizvodi namijenjeni za proizvodnju, prijenos i mjerenje struje i elektromagnetnih polja, za korištenje kod napona koji ne prelazi 1000 V za naizmjeničnu struju i 1500 V za jednosmjernu struju;

## **POGLAVLJE III. EVIDENCIJA I IZVJEŠTAVANJE**

### **Član 4. (Obveznici izvještavanja)**

Obveznici izvještavanja su svi uvoznici i proizvođači proizvoda koji nakon upotrebe postaju ambalažni otpad i električni i elektronski otpad, a koji vrše uvoz i proizvodnju na teritoriji Bosne i Hercegovine, bez obzira na sjedište.

### **Član 5. (Kvartalna evidencija i godišnji izvještaj)**

(1) Kvartalnu evidenciju o količini i vrsti proizvedenih i uvezenih proizvoda koji poslije upotrebe postaju ambalažni otpad i električni i elektronski otpad (u daljem tekstu: kvartalna evidencija), kao i godišnji izvještaj o količini i vrsti proizvedenih i uvezenih proizvoda koji poslije upotrebe postaju ambalažni otpad i električni i elektronski otpad (u daljem tekstu: godišnji izvještaj) vode svi obveznici izvještavanja prema Prilogu 1. i 2. ove uredbe.

**Član 6.**  
**(Dostavljanje godišnjeg izvještaja)**

(1) Obveznici izvještavanja dužni su da godišnji izvještaj iz člana 5. ove uredbe, dostavljaju Fondu za zaštitu okoliša FBiH (u daljem tekstu Fond) na obrascima koji se nalaze u Prilogu 2. ove uredbe koji čini njen sastavni dio.

(2) Godišnji izvještaj iz stava 1. ovog člana se vodi u pisanom i elektronskom obliku i dostavlja Fondu, najkasnije do 31. marta tekuće godine za prethodnu godinu.

(3) Operater sistema dužan je dostaviti godišnji izvještaj Federalnom ministarstvu okoliša i turizma (u daljem tekstu Ministarstvo) i Fondu.

(4) U slučaju nepotpunosti i nejasnoće podataka dostavljenih u obrascima godišnjeg izvještaja Fond može zatražiti od obveznika izvještavanja dostavljanje kvartalnih izvještaja, te ostale relevantne dokumentacije.

(5) Nakon operativne uspostave informacionog sistema upravljanja otpadom svi obveznici izvještavanja dužni su vršiti i direktni unos podataka u isti.

**POGLAVLJE IV. OBVEZNICI PLAĆANJA NAKNADE**

**Član 7.**  
**(Obveznici plaćanja naknade)**

(1) Obveznici plaćanja naknade su:

- a) Proizvođači, uvoznici, punioci, pakeri, distributeri koji vrše prvi plasman ambalaže i proizvoda upakovanih u ambalažu na tržište FBiH;
- b) Proizvođači, uvoznici i distributeri (novih i polovnih) električnih i elektronskih proizvoda koji vrše prvi plasman električnih i elektronskih proizvoda na tržište u FBiH;

(2) Naknada se plaća Fondu po ispostavljenom rješenju.

(3) Fond neće naplatiti naknadu za upravljanje otpadom obveznicima koji su prenijeli svoju obavezu upravljanja otpadom na ovlaštenog operatera sistema.

(4) Obveznici koji su prenijeli svoju obavezu upravljanja otpadom na operatera sistema dužni su blagovremeno, tj. odmah po potpisivanju ugovora sa istim obavijestiti Fond i dostaviti potpisan ugovor kao dokaz.

(5) Operater sistema je dužan, uz godišnji izvještaj dostaviti u Fond podatke o izvršenju obaveze plaćanja naknade za sve obveznike koji su na njega prenijeli svoju obavezu sa izraženim količinama na koje je plaćena naknada.

**POGLAVLJE V. KRITERIJI ZA OBRAČUN, VISINU I NAČIN OBRAČUNAVANJA I PLAĆANJA NAKNADE**

**Član 8.**  
**(Opće o naknadama)**

(1) Obveznici plaćaju dvije vrste naknada i to naknadu za upravljanje otpadom i evidentirajuću naknadu.

(2) Ovom uredbom se utvrđuju visina i način obračuna naknade i plaćanja naknade za upravljanje otpadom koju obveznici plaćaju prema Fondu.

(3) Obveznici koji su sklopili ugovor s operaterom sistema o prenosu svoje obaveze radi postizanja cilja dužni su plaćati operateru sistema naknadu.

(4) Visina naknade operatera sistema mora biti utvrđena ugovorom i biti ista za sve obveznike koji su svoju obavezu prenijeli na operatera sistema.

(5) Operater sistema je dužan javno objaviti svoje cjenovnike.

(6) Neizvršavanje obaveza prema Fondu ili operateru sistema znači akumuliranje propisanih obaveza i njihovo retroaktivno ispunjavanje od dana donošenja ove uredbe i to prema Fondu.

(7) Evidentirajuću naknadu plaćaju svi obveznici, bez obzira da li su ili ne prenijeli svoju obavezu upravljanja otpadom na operatera sistema, Fondu na temelju godišnjeg izvještaja iz člana 5. ove uredbe.

(8) Posebnu naknadu za upravljanje otpadom plaća i operater sistema ukoliko se utvrdi da isti nije ispunio propisane ciljeve za obračunsku godinu u iznosu potrebnih sredstava za ispunjenje propisanih ciljeva.

#### **Član 9. (Naknada za ambalažu)**

(1) Naknada za ambalažne proizvode obračunava se prema vrsti, sastavu i materijalu od kojeg je ambalaža izrađena i količini ambalaže plasirane na tržište FBiH.

(2) Ambalaža se razvrstava prema slijedećim kategorijama:

1. Papir
2. Plastika
3. Drvo
4. Metal
5. Višeslojni i miješani materijali
6. Staklo
7. Ambalaža onečišćena opasnim materijama

(3) Koeficijent visine naknade koja se plaća Fondu, a prema vrsti ambalaže naveden je u obrascu koji se nalazi u Prilogu 3. ove uredbe koji čini njen sastavni dio

(4) Naknada iz stava 1. se obračunava umnoškom količine proizvoda plasiranih na tržište FBiH i koeficijenta visine naknade iz stava 3. ovog člana.

(5) Cjenovnik operatera sistema za upravljanje otpadom, a prema vrsti ambalaže, operater sistema je dužan javno objaviti.

(6) Koeficijent evidentirajuće naknade iznosi 0,002 KM po kg plasirane ambalaže.

#### **Član 10. (Naknada za električne i elektronske proizvode)**

(1) Naknada za električne i elektronske proizvode obračunava se prema količini novih i polovnih električnih i elektronskih proizvoda plasiranih na tržište FBiH.

(2) Električni i elektronski proizvodi razvrstavaju se prema vrsti električne i elektronske opreme u slijedeće razrede:

- Razred 1. Veliki aparati za domaćinstvo
- Razred 1.a Aparati za hlađenje i zamrzavanje
- Razred 2. Mali aparati za domaćinstvo
- Razred 3. Opreme informatičke tehnologije (IT) i opreme za telekomunikacije
- Razred 3.a. Monitori
- Razred 4. Opreme široke potrošnje za razonodu
- Razred 4.a. Televizijski prijemnici
- Razred 5. Oprema za osvjetljenje: osvjetljenje
- Razred 5.a. Oprema za osvjetljenje: sijalice ostale
- Razred 6. Električni i elektronski alati (osim velikih nepokretnih industrijskih alata)
- Razred 7. Igračke, oprema za rekreaciju (razonodu) i sport
- Razred 8. Medicinske naprave (osim implantiranih i infektivnih proizvoda)
- Razred 9. Instrumenti za praćenje i nadzor
- Razred 10. Automati

(3) Koeficijent visine naknade za upravljanje otpadom koja se plaća Fondu, a prema razredu električnih i elektronskih proizvoda navedeni su u obrascu koji se nalazi u Prilogu 3. ove uredbe koji čini njen sastavni dio.

(4) Naknada iz stava 1. se obračunava umnoškom količine proizvoda plasiranih na tržište FBiH i koeficijenta visine naknade po razredima iz stava 3. ovog člana.

(5) Cjenovnik operatera sistema za upravljanje otpadom, a prema vrsti razredu električnih i elektronskih proizvoda, operater sistema je dužan javno objaviti.

(6) Koeficijent evidentirajuće naknade iznosi 0,02 KM po kg plasiranih električnih i elektronskih proizvoda.

#### **Član 11.**

##### **(Rješenje za plaćanje naknada)**

(1) Na osnovu obrade podataka iz godišnjih izvještaja obveznika, Fond donosi rješenje za plaćanje naknade za upravljanje otpadom i evidentirajuće naknade ili samo evidentirajuće naknade, obvezniku plaćanja naknade tekuće godine za prethodnu kalendarsku godinu.

(2) Minimalni iznos evidentirajuće naknade je 5 KM, te će se obveznicima čiji je iznos evidentirajuće naknade niži od 5 KM, izdati rješenje na 5 KM.

(3) Računi za uplatu naknada Fondu iz čl. 9. i 10. će biti objavljeni u Pravilniku o načinu uplate javnih prihoda.

(4) Protiv rješenja iz stava 1. ovog člana može se izjaviti žalba Ministarstvu putem Fonda.

(5) Obvezniku plaćanja naknade koji nije dostavio Fondu godišnji izvještaj iz člana 6. ove uredbe, Fond će naknadu obračunati paušalno na osnovu količina iz prethodne godine ili na osnovu inspeksijskog nalaza.

(6) Ako obveznik plaćanja naknade nije platio iznos naknade utvrđen rješenjem iz stava (1) ovog člana u propisanom roku, Fond će poslati opomenu obvezniku plaćanja naknade kojom nalaže način i rok uplate duga.

(7) Ako obveznik plaćanja naknade ne izvrši uplatu u roku utvrđenom opomenom iz stava 6. ovog člana, Fond će putem nadležnog suda izvršiti prinudnu naplatu shodno odredbama Zakona o izvršnom postupku (Sl. novine FBiH br. 32/03 i 33/06).

(8) Od dana izdavanja opomene iz stava 2. ovog člana do dana uplate duga Fond će obračunati zateznu kamatu za dočniju u plaćanju.

#### **Član 12. (Statusne promjene)**

(1) U slučaju prestanka poslovanja, statusne promjene i/ili promjene djelatnosti obveznik je dužan da dostavi izvještaj o količini proizvoda stavljenim na tržište u Federacije BiH za period kraći od kalendarske godine za koju se izrađuje godišnji izvještaj, a najkasnije u roku od 30 dana od dana nastupanja promjene.

(2) U slučaju raskida ugovora sa operaterom sistema ili promjene operatera sistema, obveznik je dužan da odmah po nastupanju promjene dostavi Fondu izvještaj za period obračunske godine do nastupanja promjene. Za preostali period godine obveznik dostavlja redovni izvještaj.

(3) Fond donosi rješenje za plaćanje naknade za obračunski period kraći od kalendarske godine u slučaju prestanka poslovanja, statusne promjene koja dovodi do prestanka rada obveznika ili promjene djelatnosti obveznika plaćanja naknade.

#### **Član 13. (Propisivanje naknada)**

Iznosi za naknade iz čl. 9. i 10. propisani su u Prilogu 3. ove uredbe i isti će se primjenjivati do utvrđivanja nove visine naknada.

### **POGLAVLJE VI. IZVJEŠTAVANJE FONDA I POSTUPANJE MINISTARSTVA**

#### **Član 14. (Postupanje Fonda)**

(1) Fond vodi registar svih obveznika plaćanja naknade.

(2) Fond dostavlja analizu izvještaja Ministarstvu nakon obrade izvještaja za prethodni obračunskih period svih obveznika i operatera sistema do 30.06. tekuće godine.

(3) Fond dostavlja Ministarstvu godišnji izvještaj o provođenju uredbe sa podacima o broju obveznika, prijavljenim količinama pojedinih proizvoda koji poslije upotrebe postaju posebne kategorije otpada, prednostima i nedostacima, preporukama za daljnji rad, te prikupljenim iznosima sredstava kao i informaciju o ispunjenju ili neispunjenju ciljeva operatera sistema.

(4) Ukoliko Ministarstvo utvrdi da operater sistema nije ispunio propisane ciljeve za reciklažu i iskorištenje za godinu izvještavanja Fond će mu svojim rješenjem odrediti da uplati naknadu za upravljanje otpadom za neispunjene ciljeve.

#### **Član 15. (Postupanje Ministarstva)**

(1) Na temelju izvještaja operatera sistema i Fonda, Ministarstvo analizira zadatke koje je propisalo operateru sistema dozvolom, te daje očitovanje o ispunjenju ili neispunjenju ciljeva za predmetnu godinu i vrstu otpada.

(2) Ministarstvo može staviti van snage izdatu dozvolu operateru sistema ukoliko ustanovi kršenja odredbi iste, ukoliko ustanovi da se operater sistema ne pridržava odredbi ove uredbe i ukoliko ne dokaže ispunjenje propisanih ciljeva.

(3) Ministarstvo, na temelju podataka iz izvještaja Fonda o prikupljenim sredstvima u Fondu, daje smjernice na plan ulaganja Fonda.

## **POGLAVLJE VII. OBAVEZE OPERATERA SISTEMA**

### **Član 16. (Obaveze Operatera sistema)**

(1) Operateri sistema obavezni su dostaviti godišnji izvještaj Ministarstvu i Fondu najkasnije do 31.03. tekuće godine za prethodnu godinu sa svim podacima o uvezenim, proizvedenim, izvezenim i plasiranim količinama, listingom obveznika sa prijavljenim količinama i kretanju ambalaže i električnih i elektronskih proizvoda, pregledom izvršenih uplata naknada po obveznicima.

(2) Operateri sistema su odgovorni za ispunjavanje propisanih ciljeva za reciklažu i iskorištenje po vrstama ambalažnog i električnog i elektronskog otpada.

## **POGLAVLJE VIII. NADZOR NAD PROVOĐENJEM UREDBE**

### **Član 17. (Nadzor)**

(1) Nadzor nad provođenjem ove uredbe vrši Federalni tržišni i okolišni inspektorat Federalne uprave za inspeksijske poslove.

## **POGLAVLJE IX. KAZNE NE ODREDBE**

### **Član 18. (Kazne)**

(1) Novčanom kaznom od 10.000,00 do 40.000,00 KM kazniće se za prekršaj pravno lice, a u ponovljenom prekršaju novčanom kaznom u iznosu od 50.000,00 KM do 100.000,00 KM, ako ne dostavi Fondu redovni godišnji izvještaj, u potpunosti popunjene obrasce i svu potrebnu prateću dokumentaciju (član 16. ove Uredbe);

(2) Za prekršaj iz stava 1. ovog člana kazniće se i odgovorno lice u pravnom licu novčanom kaznom od 2.000,00 KM do 5.000,00 KM, a u ponovljenom prekršaju novčanom kaznom u iznosu od 6.000,00 KM do 10.000,00 KM.

(3) Novčanom kaznom u iznosu od 1.000,00 KM do 3.000,00 KM kaznit će se lice koje obavlja samostalnu poslovnu djelatnost-obrt, za prekršaj iz stava 1. ovog člana, a u ponovljenom prekršaju novčanom kaznom u iznosu od 4.000,00 KM do 5.000,00 KM.



## **POGLAVLJE X. ZAVRŠNE ODREDBE**

### **Član 19. (Prilozi)**

Sastavni dio ove uredbe su prilozi koji su odštampani uz ovu uredbu i to:

#### **PRILOG 1. Obrazac kvartalne evidencije – OKE 1.**

#### **PRILOG 2. Obrazac godišnjeg izvještaja - OGI**

Tabela 2. Registracijski obrazac – OGI 1.

Tabela 2.1. Godišnji izvještaj za ambalažu – OGI-A

Tabela 2.2. Godišnji izvještaj za električne i elektronske proizvode – OGI-EE

Tabela 2.2.a Godišnji izvještaj za rezervne električne i elektronske proizvode – OGI-EER

#### **PRILOG 3. Koeficijenti visine naknada za ambalažu i električne i elektronske proizvode**

Tabela 3.1. Koeficijenti visine naknade za plasman ambalaže i proizvoda upakovanih u ambalažu na tržište Federacije BiH.

Tabela 3.2. Koeficijenti visine naknade za plasman električnih i elektronskih proizvoda na tržište Federacije BiH.

### **Član 20. (Stupanje na snagu)**

Ova uredba stupa na snagu 8 dana od dana objavljivanja u "Službenim novinama Federacije BiH", a primjenjuje se od 01.01.2019.godine.



PRILOG 2. Obrazac godišnjeg izvještaja – OGI

Prilog 2. Registracijski obrazac – OGI 1

OBRAZAC GODIŠNJEG IZVJEŠTAJA O PROIZVODNJI, UVOZU, IZVOZU I PLASMANU AMBALAŽE I ELEKTRIČNIH I ELEKTRONSKIH PROIZVODA		
IZVJEŠTAJNI PERIOD/GODINA		
1. OSNOVNI PODACI O PRAVNOM LICU		
1.1	Puni naziv pravnog lica	
1.2	Kanton	
1.3	Grad i općina	
1.4	Poštanski broj	
1.5	Ulica i broj	
1.6	Telefon i faks	
1.7	E-mail	
1.8	Web	
1.9	Identifikacioni broj (ID)	
1.10	PDV broj (ukoliko je registrovan u sistemu PDV-a)	
1.11	Naziv i šifra djelatnosti	
2. VRSTA PROIZVODA ZA KOJI SE PODNOSI IZVJEŠTAJ		
2.1	Ambalaža	<i>Upisati (x) u polje pored vrste proizvoda za koje se podnosi izvještaj.</i>
2.2	Električni i elektronski proizvodi	
3. PODACI OVLAŠTENOG LICA KOJE PREDSTAVLJA PRAVNO LICE		
3.1	Ime i prezime	
3.2	Funkcija	
3.3	Telefon i e-mail	
<i>Izjava: Pod punom materijalnom i krivičnom odgovornošću izjavljujem da su svi podaci navedeni u izvještaju istiniti.</i>		
<i>Ime i prezime ovlaštenog lica:</i>		<i>Pečat:</i>
<i>Potpis ovlaštenog lica:</i>		
<i>Mjesto i datum:</i>		

Tabela 2.1. Godišnji izvještaj za ambalažu – OGI-AA

<b>Obveznik:</b> _____								
<b>Izveštajni period/godina:</b> _____								
Vrste ambalaže		Papir i karton (kilograma)	Plastika (kilograma)	Drvo (kilograma)	Metal (kilograma)	Višeslojni i miješani materijali (kilograma)	Staklo (kilograma)	Ambalaža onečišćena opasnim materijama (kilograma)
Šifra		15 01 01	15 01 02	15 01 03	15 01 04	15 01 05	15 01 07	15 01 10
1	BiH	Početno stanje na skladištu						
2	Ukupne kol. za BiH	Ukupno uvezeno						
3		Ukupno proizvedeno/punjeno/upakova						
4		Ukupno izvezeno						
5	Nepovratna ambalaža	Plasirano na tržište F BiH						
6		Plasirano na tržište RS						
7		Plasirano na tržište BD						
8	Povratna ambalaža	Plasirano na tržište F BiH						
9		Plasirano na tržište RS						
10		Plasirano na tržište BD						
11	BiH	Zaključno stanje na skladištu						

**NAPOMENA:** Obveznik je dužan da u potpunosti popuni sva polja datog obrasca. Ukoliko za određena polja nema količina obvezno upisati nulu. Podaci navedeni u obrascu vezano za plasirane količine se moraju slagati sa kvartalnim izvještajima o plasmanu robe. Provjera unosa podataka će se vršiti po sljedećoj formuli (red 1+2+3-4) = (red 5+6+7+8+9+10+11). Dakle jednostavno rečeno sabiranjem količina na skladištu sa uvezenim i proizvedenim količinama od kojih se oduzima izvezena količina mora biti jednak zbiru količina proizvoda plasiranih na tržište cijele BiH i količina preostalih na skladištu koje se prenose u narednu godinu.

Izjava: Pod punom materijalnom i krivičnom odgovornošću izjavljujem da su svi podaci u izvještaju istiniti.

Ime i prezime ovlaštenog lica: \_\_\_\_\_ Pečat: \_\_\_\_\_  
 Potpis ovlaštenog lica: \_\_\_\_\_  
 Mjesto i datum: \_\_\_\_\_

Tabela 2.2. Godišnji izvještaj za električne i elektronske proizvode – OGI-EE

<b>Obveznik:</b> _____												
<b>Izveštajni period/godina:</b> _____												
Oznaka razreda	Naziv razreda	Naziv podrazreda Tip	Tarifni broj	Oznaka energetskog razreda (A+++, A++, A, B, C, D)	Početno stanje na skladištu (kg)	Uvezeno u obračunskoj godini (kg)	Proizvedeno u obračunskoj godini (kg)	Izvezeno u obračunskoj godini (kg)	Plasirano na tržište FBiH (kg)	Plasirano na tržište RS (kg)	Plasirano na tržište DB (kg)	Zaključno stanje na skladištu (kg)
1	2	3	4	5	6	7	8	9	10	11	12	13

\* Razrede električne i elektronske opreme preuzeti iz člana 10. Uredbe

**NAPOMENA:** Obveznik je dužan da u potpunosti popuni sva polja datog obrasca. Ukoliko za određena polja nema količina obvezno upisati nulu. Podaci navedeni u obrascu vezano za plasirane količine se moraju slagati sa kvartalnim izvještajima o plasmanu robe. U izvještaj se unose svi podaci vezano za uvoz i plasman EE proizvoda uključujući i polovne EE uređaje. Provjera unosa podataka će se vršiti po sljedećoj formuli (kolone 6+7+8-9) = (kolone 10+11+12+13). Dakle jednostavno rečeno sabiranjem količina na skladištu sa uvezenim i proizvedenim količinama od kojih se oduzima izvezena količina mora biti jednak zbiru količina proizvoda plasiranih na tržište cijele BiH i količina preostalih na skladištu koje se prenose u narednu godinu.

Izjava: Pod punom materijalnom i krivičnom odgovornošću izjavljujem da su svi podaci navedeni u izvještaju istiniti, a količine tačne ili procjenjene u skladu sa važećom zakonskom regulativom.

Ime i prezime ovlaštenog lica: \_\_\_\_\_ Pečat: \_\_\_\_\_  
 Potpis ovlaštenog lica: \_\_\_\_\_  
 Mjesto i datum: \_\_\_\_\_

Tabela 2.2. Godišnji izvještaj za rezervne dijelove za električne i elektronske proizvode – OGI-EER



PRILOG 3. Koeficijenti visine naknada za ambalažu i električne i elektronske proizvode

Tabela 3.1. Koeficijenti visine naknade za plasman ambalaže i proizvoda upakovanih u ambalažu na tržištu Federacije BiH.

Vrsta ambalaže	Koeficijent naknade [KM/kg]
staklo	0,03
metal	0,025
papir i karton	0,03
plastika	0,04
drvo	0,02
Višeslojni i ostali materijal	0,04
Ambalaža koja sadrži ili je onečišćena opasnim materijalima	0,60

Tabela 3.2. Koeficijenti visine naknade za plasman električnih i elektronskih proizvoda na tržište Federacije BiH.

Oznaka razreda	Naziv razreda	Koeficijent visine naknade KM/kg
Razred 1	Veliki kućni aparati	0,06
Razred 1a	Aparati za hlađenje i zamrzavanje	0,20
Razred 2	Mali aparati za domaćinstvo	0,06
Razred 3	Oprema informatičke tehnologije (IT) i oprema za telekomunikacije	0,12
Razred 3a	Monitori	0,80
Razred 4	Oprema široke potrošnje za razonodu	0,06
Razred 4a	Televizijski prijemnici	0,80
Razred 5	Oprema za osvjjetljenje: osvjjetljenje	0,06
Razred 5a	Oprema za osvjjetljenje: sijalice	1,00
Razred 6	Električno i elektronsko oruđe (osim velikog nepokretnog industrijskog oruđa)	0,06
Razred 7	Igračke, oprema za slobodno vrijeme i sport	0,12
Razred 8	Medicinski aparati (osim aparata koji mogu prouzrokovati radijaciju ili infekciju)	1,50
Razred 9	Instrumenti za praćenje i nadzor	0,80
Razred 10	Automati	0,06

Podrazredi električne i elektronske opreme su određeni Pravilnikom o upravljanju otpadom od električnih i elektronskih proizvoda.